

Script Of Evening Gojri News Bulletin 05 June 2024 at 1700 Hrs

ایوننگ گو جری نیوز بلیٹن مورخہ 05 جون 2024

یوہ آکا شوانی جموں بے نصرت چودھری نے خادم حسین تیں خبر سُنو۔ پہلاں خاص خاص خبر۔

- *1۔ نویں سرکار غی تشکیل توں پہلاں اج وزیر اعظم نریندرمودی نے تمام وزراء سمیت صدر جمہوریہ درویدی مرمو نانہہ اپنو استعفو سونپیو ہے۔
- *2۔ چین نے وزیر اعظم نریندرمودی نانہہ عام انتخابات مانہہ این ڈی اے غی کامیابی وں مبارکباد پیش کی۔
- *3۔ اج ماحولیاتی مسائل بارے بیداری خاطر ماحولیات بارے عالمی تہاڑو مانیو جا رہیو ہے۔
- *4۔ تے لیفٹنٹ گو رنر منوج سنہا نے کہیو ہے جے ماحولیات سب تیں پہلاں مہارو نظریو بے تے تباہ شدہ ماحول غی بحالی خاطر ہم پر عزم ہاں۔

خبراں غی تفصیل نال پہلاں خادم حسین۔

PM Resignation

وزیر اعظم نریندرمودی نے اج راشٹر پتی بھون مانہہ تمام وزراء سنگ صدر جمہوریہ درویدی مرمو سنگ ملاقات کی اور انہاں نانہہ اپنو استعفو سونپیو ہے۔ اس موقع وں صدر جمہوریہ نے وزیر اعظم اور وزراء تیں گزارش کی جے وے نویں سرکار بنن تک اپنا فرائض انجام دیں۔

Cabinet Meeting

ستارویں لوک سبھا غی تحلیل غی سفارش خاطر اج وزیر اعظم نریندرمودی غی رہائش گاہ وں مرکزی کا بینہ غی میٹنگ منعقد ہوئی۔ میٹنگ مانہہ مرکزی وزراء امت شاہ، راجناتھ سنگھ، نتن گڈکری سمیت کئی ہور وزیر وی ات موجو د تھا۔ واضح رہے جے یاہ میٹنگ لوک سبھا چناؤ مانہہ این ڈی اے اتحاد غی کامیابی توں اک روز بعد منعقد ہوئی۔

NDA Meeting

بی جے پی غی قیادت آلی این ڈی اے غا ارکان پارلیمان غی میٹنگ نویں دہلی مانہہ جمعہ آلی روز متوقعہ ہے۔ میٹنگ مانہہ بی جے پی، ٹی ڈی پی، جے ڈی یو، ایل جے پی آر، شندے گروپ غی شیو سینا اور این ڈی اے سنگ جڑی دوجی جماعتاں غا نواں چنندہ ایم پی شرکت کریں گا۔

JDU NDA

اج جنتا یو نائیڈ غی طرفوں کہیوگیو ہے کہ جماعت نریندرمودی غی زیر قیادت این ڈی اے اتحاد غی حمایت کرے گی۔ اس سلسلہ مانہہ پارٹی ترجمان کے سی تیگی نے کہیو ہے جے ڈی یو غا انڈیا بلاک توں باہر آن غی وجوہات اجاں وی موجو د ہیں اوتر واپس جان غو کوئے سوال پیدا نہیں ہوتو۔ انہاں نے کہیو ہے ان غی جماعت بہار غی ترقی واسطے خصوصی درجو حاصل کرن غی خواہش مند ہے۔ انہاں نے الزام لایو ہے جے انڈیا

بلاک افواہاں غو مرکز بن گیو ہے اور کانگریس اور انڈیا بلاک کول سرکار بنان غی تعداد موجود ہیں ہے۔ انہاں نے جانکاری دتی ہے جے بہار غا وزیر اعلیٰ نتیش کمار اج این ڈی اے غی میٹنگ مانہہ شرکت کریں گا اور این ڈی اے تے وزیر اعظم نریندرمودی نانہہ حمایت غو خط سو نہیں گا۔

China Modi NDA

چین نے اج وزیر اعظم نریندرمودی نانہہ عام انتخابات مانہہ بی جے پی غی زیر قیادت این ڈی اے اتحاد غی کامیابی ور مبارکباد پیش کی ہے۔ اور کہیو ہے جے چین باہمی تعلقات نانہہ مد نظر رکھتاں واں بھارت سنگ کم کرن واسطے تیار ہے۔ بھارتی چناؤ کمیشن غی طرفوں تمام نشستوں غا نتائج غو اعلان کر دتو گیو ہے۔ جس مانہہ کل 543 سیٹاں وچوں بی جے پی نے 240 جد کہ کانگریس 99 سیٹاں ور جیت حاصل کی ہے۔ اور اس طرح بی جے پی غی قیادت آلو این ڈی اے اتحاد اکثریت غی تعداد 272 سیٹاں نانہہ پار کر چکو ہے۔ واضح رہے جے بی جے پی ذاتی طور ور 2014 تیں بعد پہلی بار اکثریت غی تعداد پار کرن مانہہ ناکام رہی ہے۔ اس سلسلہ مانہہ چین غی خارجہ وزارت غا ترجمان ماؤ ننگ غی طرفوں این ڈی اے اور بی جے پی غی کامیابی ور وزیر اعظم نریندرمودی نانہہ مبارکباد دتی گئی۔

JDU RJD Leaders

بہار غا وزیر اعلیٰ نتیش کمار اج نویں دہلی پُج گیا ہیں اور وے این ڈی اے اتحاد غی میٹنگ مانہہ شرکت کریں گا۔ سرکار بنان غا سوال غو جواب دیتاں واں انہاں نے کہیو ہے جے بن حکومت تشکیل دتی جائے گی۔ اس موقع ور جے ڈی یو غا ممبر پارلیمنٹ سنجے جہا وی اُن سنگ موجود تھا۔ انہاں نے کہیو ہے جے این ڈی اے نے بہار مانہہ بہترین جیت حاصل کی ہے۔ اس تیں علاوہ لوک جن شکتی پارٹی رام ویلاس غا لیڈر چراغ پاسوان وی این ڈی اے غی میٹنگ مانہہ شرکت خاطر نویں دہلی پُج گیا ہیں۔ جن غی جماعت نے بہار غی 5 سیٹاں ور کامیابی حاصل کی ہے۔ اُنکاں آر جے ڈی غا لیڈر تیجسو یا دو وی انڈیا بلاک غی میٹنگ مانہہ شرکت کرن خاطر نویں دہلی پُج گیا ہیں۔ انہاں نے اخباری نمائنداں سنگ گل کرتاں واں کہیو ہے جے لوک سبھا چناؤ غی ووٹنگ جمہوریت اور آئین نانہہ بچان واسطے ہونی ہے۔

Delhi BJP

اج دہلی بی جے پی غا صدر وریندر سچدیو نے دعویٰ کیو ہے جے انڈیا بلاک ہور ریاستاں مانہہ مقابلہ غی وجہ تیں دہلی غی تمام سیٹاں ور ناکام رہیو ہے۔ نویں دہلی مانہہ اک پریس کانفرنس سنگ خطاب کرتاں واں انہاں نے کہیو ہے جے عام آدمی پارٹی اور کانگریس پنجاب جیسی ریاستاں مانہہ مقابلو کرتی کرتی دہلی مانہہ اپنی پشان کھو بیٹھا ہیں۔ عام آدمی پارٹی غا نعرہ ”جیل غا جواب ووٹ سے“ ور طنز کرتاں واں انہاں نے کہیو ہے جے دہلی غا لوکاں نے نعرہ گو صحیح جواب دے دتو ہے۔ اس موقع ور انہاں نے دہلی غا نواں چُنندہ 7 پارلیمنٹ ممبران نانہہ مبارکباد وی پیش کی۔ آکاشوانی سنگ گل کرتاں واں انہاں نے کہیو ہے جے لوک سبھا چناؤ مانہہ بی جے پی غی کامیابی دہلی مانہہ آن آلا اسمبلی چناؤ واسطے اک اشارو ہے۔ اس موقع ور آکاشوانی سنگ گل کرتاں واں دہلی ساؤتھ غا نواں ایم پی رمویر سنگھ بدھرووی نے کہیو ہے جے دہلی مانہہ بی جے پی غی کامیابی وزیر اعظم مودی غا کم اور پارٹی گا جنتاں غو نتیجو ہے۔

یہ خبر تم آکا شوانی جموں تیں سُن رہیا ہیں خبراں غا باقی حصہ نال نصرت چودھری۔

World Environment Day

وزیر اعظم نریندر مو دی نے اج ماحول با رے عالمی تہاڑا غا موقع ور بُدھ جیانت پارک نویں دہلی مانہہ ”اک پیڈ ماں غے ناں“ مہم غے تحت اک بوٹو لایو۔ مہم غو مقصد پورا مُلک مانہہ بڑا پیمانہ ور بوٹا لانو ہے۔ اس موقع ور ماحولیات غا مرکزی وزیر بھوپیندر یا دو اور نویں دہلی غا لیفٹنٹ گو رنر ونے کمار سکسینہ وی اُت موجو د تھا۔ ماحولیات با رے عالمی تہاڑا نانہہ ماحولیاتی مسائیل با رے بیداری غی خاطر مانیو جا ئے۔ جس غی شروعات اقوام متحدہ غی جنرل اسمبلی غی طرفوں انسانی ماحولیات سٹاکلم کا نفرنس مانہہ 1972 مانہہ کی گئی تھی اور کا نفرنس توں اک سال بعد 1973 مانہہ پہلی بار یوہ تہاڑو مانیو گیو تھو۔ اور تد تیں ہر سال 5 جون نانہہ یوہ تہاڑو مانیو جا ئے۔ اس موقع ور صدر جمہو ریہ محترمہ درویدی مُرمو نے کہیو ہے جے لوک پائیداری ور مبنی اور سر سبز دُنیا غی تعمیر خاطر اجتماعی کوشش کریں۔ سماجی ذرائع ابلاغ ور اُنہاں نے کہیو جے یوہ دن دھرتی نانہہ محفوظ کرن واسطے ہم نانہہ مہاری ذمہ ساری یا د کراوے۔ اُنہاں نے کہیو جے موسمی تبدیلی کمزور کنیاں غی زندگیاں اور معاش نانہہ متاثر کر رہی ہے۔ اس موقع ور نائب صدر جگدیپ دھنکڑ نے لوکاں نانہہ اس دن غی مبارکباد دیتاں واں کہیو جے انسانیت اور قدرت بشکار ہم آہنگی پائیدار زندگی غی بنیا د ہے۔ اُنہاں نے کہیو جے تمام لوک پائیداری کا اصولاں ور چلن غو عہد کریں تانجے دھرتی غی حفاظت کی جا سکے۔

LG WED

لیفٹنٹ گو رنر منوج سنہا نے اج سازگری پورہ سرینگر مانہہ ماحولیات با رے عالمی تہاڑا غا موقع ور ”مہاری زمین مہارو مستقبل“ نامی کا نفرنس سنگ خطاب کیو۔ یاہ تقریب ناگین جھیل غی حفاظت با رے تنظیم (این ایل سی او) غی طرفوں منعقد کی گئی تھی۔ اس موقع ور اپنا خطاب مانہہ ایل جی موصوف نے خُشک سالی جیسی للکاراں نال نمڑن واسطے زمین غی بحالی ور لو کہلی۔ اُنہاں نے کہیو جے ماحولیات سب تیں پہلاں مہارو نظریو ہے۔ اور ہم تباہ شدہ ماحول نانہہ بحال کرن واسطے پُر عزم ہاں۔ اُنہاں نے کہیو جے مہاری مشترکہ کوشش خراب موسمی صورتحال مانہہ خوراک غا تحفظ اور معاش نانہہ فروغ دیں گی۔ اس موقع ور اُنہاں نے غیر سرکاری تنظیمیں، مالیاتی اداراں اور کاروباری تنظیمیں ور زور پایو جے وے ماحول غی بہتری اور تحفظ واسطے لگن سنگ کم کریں۔ اس موقع ور اُنہاں نے ماحول غا تحفظ اور پائیدار زندگی غی ترقی واسطے یوٹی انتظامیہ غا عزم نانہہ وی یاد کرایو۔ اور جموں کشمیر غا حیاتیاتی تنوع مانہہ محفوظ کرن اور سرکار غا پروگراماں با رے وی گل کی۔ اس موقع ور اُنہاں نے گلشتر کھشلسر جھیلاں غی تبدیلی واسطے مذکورہ تنظیم غی سرابنا کی اور انتظامیہ غی طرفوں ہر ممکن مدد غی یقین دہانی وی کرائی۔

SMVDSB WED

ماحولیات با رے عالمی تہاڑا غا موقع ور ماتا ویشنو دیوی شرانین بورڈ انتظامیہ غی طرفوں اک نویں پہل غی شروعات کی گئی ہے۔ جس غے تحت ماتا ویشنو دیوی آن آلا عقیدت مند پر شاد غا طور ور بوٹا لا ویں گا۔ جس غی شروعات اج تیں نہا رکا بھون تیں کی گئی۔

اس سلسلہ ماتہ مہارا نامہ نگار دویندرٹھاکر سنگ گل کرتاں واں مذکورہ بورڈ گا سی ای او
انشول گرگ اور کُجھ عقیدت منداں نے اس طرح کہیو۔۔بانٹ۔۔

WED Poonch

اک اہم ماحولیاتی پہل ماتہ با رڈر سکیورٹی فورس غی 141 ویں ہٹالین نے عالمی یوم
ماحولیات غا موقع ور پونچھ ماتہ قبضہ لکیر غے نیڑے لگ بھگ 3 ہزار بوٹا لایا۔ اج
سویرے بی ایس ایف غا دستاں نے مقامی لوکاں تے بچاں غے نال لوور، اپر کھنیتر ماتہ
بوٹا لا غے ماحولیاتی عالمی تہاڑو منایو بعد ماتہ بی ایس ایف غا دستاں نے قبضہ لکیر ور
بوٹا لایا۔ جہیڑا فوجیاں ناتہ سایو فراہم کریں گا نالے بھارتیہ علاقہ ماتہ دراندازی کرن
آلاں تیں حفاظت کریں گا۔ کمانڈینگ افسر کرنل نگریندہ سنگھ روتیلا نے مہارا ضلع نمائندہ
انو بھو مصری غے نال گل کرتاں واں کہیو۔۔ بانٹ۔۔

WED Kishtwar

گو رنمنٹ ڈگری کالج کشتواڑ نے عالمی یوم ماحولیات غا موقع ور ”میں دھرتی“ غا عنوان
تیں اک طاقت ور تھیٹر ور پرفارمنس پیش کی۔ یوہ ڈرامو محکمہ ماحولیات، این ایس ایس
یونٹ، سی وی پی ایل، کیرو پن بجلی پروجیکٹ تے جے کے پی سی سی کشتواڑ غے
درمیان اک مشترکہ کوشش نے سیا رہ ور انسانی اثرات غا با را ماتہ اک فکر انگیز پیغام
دتو۔ ”میں دھرتی“ ناں غی دلکش کہانی غے ذریعے انسانی لالچ غے تباہ کن نتائج دسیا۔ ڈپٹی
کمنڈر ڈاکٹر دیوانش یا دو اس موقع ور مہمان خصوصی تھا۔ انہاں نے اس طرح کہیو۔۔ با
نٹ۔۔

اس غے نال ہی خبراں غو یوہ بلیٹن ختم بوؤ۔